

Dialogo y respet ta esencial pa progreso di un pais

“Pueblo mester sinti cu su interes ta wordo bon sirbi den Parlamento”

Su Excelencia Gobernador Fredis Refunjol



ORANJESTAD- Na inicio di 2007, tabata Gobernador Fredis Refunjol kende den su discurso a muestra cu aña 2007 ta colma di reto, colma di asuntonan cu tin cu wordo atendi den un forma diferente cu esaki a tuma lugar den 2006. Den un forma cla, nos

representante di La Reina a muestra cu su persona ta mira atras riba 2006, cu sentimentonan mixto, caminda e confrontacion entre gremionan tabata fuerte dentro di tereno politico, tabata hopi fuerte mes y cu esaki sin duda a afecta decisionnan cu mester

a wordo tuma riba diferente asunto di legislacion.

Segun Gobernador, pa evita na bolbe crea un situacion di confrontacion manera den 2006, lo ta esencial pa den 2007 pone enfasis riba dialogo, ya cu ta e unico forma pa sirbi interesnan di pais Aruba.

“Dor di dialogo, democracia dualistico lo haya forma. Dialogo tin cu tuma lugar entre ciudadano representante di pueblo, entre Parlamento y Gobierno, entre Gobierno y cuerponan consultativo y gremionan den comunidad. Dialogo ta nifica cu nos tin cu scucha otro cu respet pa nan funcion, responsabilidad y experticio. Dialogo ta nifica cu nos tin cu razona a base di argumentonan cu contenido y cu por yuda duna un aporte na e decision final. Semper dirigi pa sirbi e interes nacional mas cu por,” Gobernador a señala.

Den un mensahe cu ta dirigi pa duna un aporte pa tur instancia y Gobierno duna un ehempel mas positivo na comunidad, Gobernador Refunjol a sigui muestra cu dor di hibando un dialogo al caso y efectivo, ta pone cu pueblo lo sinti su mes representa den parlamento.

Na mes momento Gobernador a pone enfasis, cu dialogo ta

nifica duna otro espacio pa cherche nan responsabilidad, pa di e forma aki duna un aporte significativo na e asunto cu tin cu wordo atendi.

“Dialogo ta nifica cu tur cuerpo consultativo ta haya suficiente tempo pa duna nan conseho riba contenido di un ley. Cu otro instancianan tambe ta wordo scucha riba esaki. Cu tin suficiente tempo y espacio pa analisa y discuti un concepto di ley nobo y cu esaki ta wordo atendi y discuti ampliamente caminda esaki tin cu ser discuti, cu ta Parlamento di Aruba,” Gobernador a sigui muestra.

PARLAMENTO

Gobernador den su discurso tambe a muestra riba diferente otro punto y tambe e funcionamiento di Parlamento di pais Aruba, mustrandocu Parlamento ta e Consejo Legislativo mas halto di nos pais.

Ta na parlamento pa defini y atende, si ta necesario notanan di cambio relaciona cu e asunto concerni, y no hiba e discusionnan aki fuera di loke ta exige pa nan ser atendi.

Den Parlamento, Gobernador a muestra, ta caminda tin cu haci tur pregunta, trece dilanti tur duda y puntonan

cu no ta mucho cla di un ley, principalmente pa medio di nos parlamentarionan riba puntonan conflictivo y e concepto di ley relaciona cu nos constitucion.

Aki Gobernador tambe a muestra cu pa hiba e discusionnan aki, parlamentarionan tambe mester ta presente ora cu ta atende cu asuntonan aki, y si ta necesario, tin cu hiba deliberacionnan entre otro na tur momento, riba asuntonan cu ta regarda funcionamiento di nos legisladornan.

Su Excelencia a trece dilanti tambe cu ta practicamente contra principianan democratico den Reino, pa no hiba un dialogo den Parlamento y despues exige di Gobernador pa su persona pone un decision di Parlamento un banda.

Pues e mensahe cla di Gobernador den su discurso na e recepcion di cambio di aña, tabata sin duda pa esnan concerni, esnan cu tin cu carga responsabilidad pa desaroyo di nos pais, sin excepcion di ningun, dialoga mas tanto. Pa dialoga a base di respet mutuo, a base di respet pa tur otro nan responsabilidad y loke nan ta representa, ya cu ta a base di un dialogo cu respet, lo sirbi interes general di nos pais.